



Na osnovu člana IV. 3. b) Ustava Bosne i Hercegovine i člana 186. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20, 53/22, 59/23, 87/23, 50/24, 73/24 i 56/25), a u vezi s članom I. 7. e) Ustava Bosne i Hercegovine, Predstavnički dom Parlamentarne skupštine Bosne i Hercegovine je na 35. sjednici, održanoj 22. 1. 2026. godine, donio

DOPUNE
POSLOVNIKA PREDSTAVNIČKOG DOMA PARLAMENTARNE SKUPŠTINE
BOSNE I HERCEGOVINE

Član 1.

U Poslovniku Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20, 53/22, 59/23, 87/23, 50/24, 73/24 i 56/25) u članu 43. stav (1) nakon tačke g) dodaje se nova tačka h) koja glasi:

„h) Komisija za saradnju sa iseljeništvom;“.

Dosadašnja tačka h) postaje tačka i).

Član 2.

Nakon člana 49a. dodaje se novi član 49b. koji glasi:

„Član 49b.

(Komisija za saradnju sa iseljeništvom)

(1) Komisija za saradnju sa iseljeništvom razmatra pitanja koja se odnose na:

- a) predlaganje mjera za unapređivanje saradnje institucija Bosne i Hercegovine sa iseljeništvom i razvijanje međuinstitucionalne koordinacije za saradnju sa iseljeništvom;
- b) davanje mišljenja o svim pitanjima iz oblasti saradnje sa iseljeništvom koje razmatra Dom;
- c) ostvarivanje i održavanje redovnih kontakata sa svim državnim organima Bosne i Hercegovine, te organima na nižim nivoima vlasti koji se bave pitanjem saradnje sa iseljeništvom;
- d) ostvarivanje i održavanje redovnih kontakata sa svim nevladinim i drugim organizacijama koje se bave položajem iseljenika iz Bosne i Hercegovine u inozemstvu;
- e) saradnju s Ministarstvom za ljudska prava i izbjeglice Bosne i Hercegovine i Ministarstvom vanjskih poslova Bosne i Hercegovine prilikom izrade strateških i drugih akata koji se odnose na položaj iseljenika;
- f) održavanje redovnih sastanaka, konferencija, okruglih stolova i drugih događaja na kojima će se razmatrati položaj iseljenika i predlagati mjere za unapređenje položaja;

- g) redovan obilazak zajednica iseljenika iz Bosne i Hercegovine u inozemstvu i praćenje njihovog statusa u zemljama prijema;
- h) stvaranje uslova za povratak iseljenika u Bosnu i Hercegovinu radi njihovog uključivanja u politički, ekonomski i kulturni život Bosne i Hercegovine;
- i) stvaranje uslova za aktivnije učešće iseljenika u razvoju investicija i projekata u funkciji razvoja Bosne i Hercegovine;
- j) ostvarivanje saradnje sa sličnim komisijama i parlamentarnim tijelima u zemljama prijema gdje žive iseljenici iz Bosne i Hercegovine s ciljem unapređenja njihovog statusa u tim zemljama;
- k) vršenje parlamentarnog nadzora nad svim organima i institucijama koji se bave pitanjem iseljeništva.

(2) Komisija razmatra i druga pitanja iz oblasti saradnje sa iseljeništvom.“

Član 3.

Ove dopune Poslovnika stupaju na snagu sljedećeg dana od dana objavljivanja u „Službenom glasniku BiH“.

Broj: 01,02-02-1-2447-1/25
Sarajevo, 22. 1. 2026. godine

Predsjedavajući
Predstavničkog doma
Parlamentarne skupštine BiH

Marinko Čavara